

## VUOGGHIU ABBULARI

Jàvi 'a cruna  
ri fila r'argentu  
'a luna  
e 'n mantu ri stiddi trapuntu  
nnô cielu  
sta notti.  
Jàvi l'uocci e 'u nasu  
e 'a vucca ca parra e arriri  
a cu' 'a senti  
e a cu' 'a viri.

E gghiàvi l'ali :  
'I ravanti 'na nuvola ciàra  
c'â tira,  
e una 'i rarièri, ciù scura,  
c'â ammutta.  
Ogni tantu s'ammuccia  
e puoi torna,  
ciù bedda e ciù allecra,  
a 'bbulari.

Iu,  
rarièri a finestra,  
taliu e 'a 'mmirù  
e a 'n mumentu m'addrizzu  
piliannu :  
-Iu macàri,  
iu 'i vuogghiu macàri  
ru' ali !-  
E n' zautu appizzu  
furiusu,  
ma sulu 'n parmu  
mi susu  
e ddù ita  
ri 'n terra,  
n' siennici nuddu ri sutta  
ca ammutta,  
e ammecì cuarcunu  
tira e m'afferra.

Stancu m'assittu,  
suratu , abbilutu.  
E' ura ca cianciu  
'na lacrima muta,  
scunsulata.  
Ma è sulu 'n mumentu  
e puoi arriru  
e mi fazzu curagghiu  
'n ca sientu  
ca 'u pinzieri mi sciogghiu  
e 'u 'mmuttu  
e l'assu ca abbola  
jàutu  
ddà supra ,  
anzina ntâ luna.

E iu  
assiemi ci accianu  
cu r'ìddu, ri supra :  
e 'a affieru ppê corna  
e 'a gghìru  
e a cavaddu m'assittu nâ varca  
e chê pieri e chê manu  
a rimari mi mettu  
pi gghiri luntanu  
pê setti mari rô cielu  
nô viersu rô sulì,  
ô vientu ,  
cumentu,  
cantannu.

E sientu nô piettu  
ca 'nzoccu 'i sta notti m'arresta  
e râ vita,  
è 'na festa,  
'na favula bella  
ca jàiu 'i cuntari turnannu,  
rumani.